

東謚謚

井

法

誥

勅考法



三三三

一

二

三

三三三



東
井
誥
勅

左
鑑
著

中
華
書
局

叢書集成初編

謚

法（及其他二種）

中華書局出版發行

秦皇島市資料印刷廠印刷
（北京王府井大街三十六號）

一九八五年北京新一版

開本：七八七乘一〇九二毫米 三十二分之一
統一書號：一七〇一八·一五一

東井誥勅

此據涇川叢書本
排印初編各叢書
僅有此本

東井誥勅

明 東井左 鑑著

都察院左副都御史張衍慶誥

國家設御史中丞專貳其長以總判臺事肅清風俗彈糾內外卽周官小宰之職自上世以來非一時髦彥不以輕授蓋其慎哉爾都察院左副都御史張衍慶以世臣之裔守其家訓奮于甲科肆爲教皇察爾學有本原可以備論思文有師法可以光訓典官之翰苑蓋需于成爾乃好古知方多識畜德往紬文于祕閣暨校才於禮闈紀載合是非之公文章變鈎棘之習可謂賢哉朕惟自古詞臣一視中外輟自禁省服于名藩承宣有聲仕學並懋晉司留務未究爾能遂用僉言俾在此位載德秉義休于三世持廉守公真是百僚朕甚嘉焉比嘗覃恩階爾通議大夫錫之誥詞茲遷大慶爾以爲請朕方賴爾以重風霜之任則亦何愛于一命而不以寵綏之哉益自奮庸以稱朕意

都察院右副都御史張文魁誥

古者天子使其大夫爲三監監于方伯連帥之國今巡撫都御史是也願其任司激揚責兼文武選衆而舉惟朕其難之爾都察院右副都御史張文魁蔚以茂才登于天府自居郎署執政者言其經德不回守法專固俾參藩議物論歸焉頃以爾賢授之亞列西北馬政因以付爾廉靖不苟寒淵有狀庶幾僕臣之

正哉。考勞敍遷。長朕岳牧。敘此大惠。燕及晉齊。吏士黎庶。信而愛之。擢副中憲。經營朔方。鎮危立利。比于南仲。遂使朕無西顧之憂。而百姓得遂有生之樂者。皆爾之力也。茲以元嗣覃恩。特授爾階通議大夫。錫之誥命。夫邊政多弛。郊壘未平。朕思有以勵焉。仁義並用。爾尙勤撫鎮之方。出入均勞。朕豈忘道途之念。無或不勗。以負眷懷。欽哉。

南京國子監祭酒倫以訓誥

今祭酒卽古師保氏之任。以德行道藝。教養國子者也。後世第以聰明有威重者爲之。殊非官人之道哉。我國家特重其選。而廷臣會推。時予新命。傳不云乎。國之將興。尊師而重傅。爾南京國子監祭酒倫以訓。孝廟名臣之家。毅皇及第之士。比在翰苑。文行蔚然。效理編摩。視古良史。求才之任。屢以付之。文武佳士。多所自出。至於經筵勸講。輸誠格心。可不謂文質彬彬。論篤君子哉。頃進宮坊。物望愈偉。而有司以南京祭酒來言。朕惟斯皇祖首善之地。尙江左風靡之餘。一變至道。非爾不可。爾乃寬而教敷。嚴而道尊。張禮義廉耻之維。略章句文字之學。允協士論。亟簡朕心。茲特授爾階朝議大夫。錫之誥命。詩有之。善善者我。樂育才也。爾能長育人材。豈惟朕嘉。將天下樂之矣。欽哉。

南京國子監祭酒倫以訓父誥

朕惟將相之家。久而鮮不失者。矧有父子兄弟。業擅一經。名魁三試。弈世載德。累朝策勳者乎。茲惟世臣。朕所嘉予。爾贈奉直大夫。原任右春坊右諭德。兼翰林院侍講倫文敘。乃吏部驗封清吏司主事。以諒南

京國子監祭酒以訓之父躬履一德休有古人之風罔羅六藝允爲多聞之士粵從東廣首荐南宮肆朕先皇親擢第一簡司史館旋進儲閣啓沃編摩多所裨益夫文章滿天下而位有弗克慶澤及嗣人而命之不淑朕甚憐焉茲以爾子訓貴特贈爲朝議大夫南京國子監祭酒嗚呼古稱才難於爾爲盛存沒榮哀爾魂慰哉

翰林院侍讀學士姚涑誥

古謂朝廷之官雖宰相亦可雜以他才爲之惟翰林院學士非文章之士不可朕殊以爲不然夫德必有言文能貫道不兼二者何所用之爾翰林院侍讀學士姚涑以名臣之子學該流略詞擅典麗卒澤于仁義道德炳如也往賜大對朕擢第一玉堂之署方喜得人頃者珥筆記言分經校藝敘事得編摩之體題才革浮靡之風一時中外無不稱善維予祖訓丕顯丕承朕命哀輯昭示萬世爾居其間效勞爲多課功敘升俾奉經緯豈惟挈詞翰以屬爾蓋將資議論以起予爾乃論唐虞考仁聖昭然發朦臬義冰釋所謂正學以言嘉謀入告蓋兩有之朕用喟嘆得此三益茲以元嗣草恩特授爾陪奉直大夫錫之誥命於乎我國家第重魁倫然能以其身任天下之重如商輅諸臣卒亦難得爾尙慎愆期休于前聞人豈惟朕嘉亦將光爾家世欽哉

翰林院侍讀學士姚涑父誥

維昔上帝陳錫于周不特及其子孫而又及其羣臣之後嗣厥猶翼翼生此王國蓋嘗嘆息安得公卿大

臣子子孫孫勿替引之而與國同休也。爾原任總制三邊兵部尙書兼都察院右都御史姚鏐乃翰林院侍讀學士涑之父。往以茂材進由高第。性于廉潔。輔之忠勤。聲聞在中臺。政學在藩臬。功業在邊疆。威望在夷狄。歷事三朝。率由一道。蓋文武之偉器。抑社稷之靈臣。方欽吉猷。遽求謝事。有子名世。載德敷傳。不云乎。周公拜前。魯公拜後。往聞其語。於今見之。茲特進爾階資政大夫。卿其彊飲食。節起居。厚自攝養。需爾嗣人。永爲國輔。卿之厚德。天必相之矣。欽哉。

署掌南京翰林院事左春坊左諭德兼翰林侍講王教誥

文章與時盛衰。三代以來。如南漢之文。尙辭氣藹然。深厚爾雅。有古之風烈。至六朝而敝爲甚。我國家革末世浮靡之習。復前代典謨之制。今南京固六朝舊地也。將無猶仍其初乎。爾署掌南京翰林院事左春坊左諭德兼翰林院侍講王教。以龍飛進士第二人。領史職。則比良遷董。侍經幄。則雅言堯舜。典文衡。則兼美陸歐。朕甚嘉之。比有司言。掌南京翰林院員缺。朕惟斯詞章之府。學者所師。命輟講事以往。爾乃慎行蓄德。介然自居。茂學懿文。銳於復古。使今之言語文章。三代並休。四方同風。爾之勞勩。益足褒尙。茲以廟祀覃恩。特授爾階奉直大夫。錫之誥命。往懋厥脩。以需其後。

內閣誥勅房辦事尙寶司少卿張湘誥

王者制誥之詞。所以嘉臣善。達主知。以勵世風。自前代以來。並以他官領之。不限於資秩職署。蓋得古者惟其人之義爾。內閣誥勅房辦事尙寶司少卿張湘。以循吏之子。魁於三晉。來舉進士。朕見爾直方敬慎。

有守臣之風。選在內廷。預司機務。職久而益密。望隆而彌謙。頃思王言之重。欲得人以潤色焉。維朕相臣。稱爾曰可。涉筆演綸。遂以付之。課勞敍陞。擢官亞列。爾乃刪浮存實。詳略知體。使朕言語文章。發之而感人心。垂之而爲國華。朕甚嘉焉。茲特授爾階奉直大夫。錫之誥命。服此訓辭。愈其忠懋。朕當圖所以進爾者。

翰林院編修郭朴勅

古今論相業者。必曰韓琦。至以爲過於周公。然自其在館閣時。已有重望於天下。朕嘗思其人。考其所自出。固蕞陽之珍也。爾翰林院編修郭朴。聰慧英敏。得之天與。又幸生于大賢君子之鄉。所儀刑。卽少而從學。不肯碌碌。泊舉進士。讀書祕垣。修詞立誠。一時推重。登瀛之選。朕豈爾私。茲復授爾階文林郎。錫之勅命。咨爾朴。以爾器度之端純。問學之博雅。何遠不致。其務潛心大道。培植器業。以需後用。以休于前聞人哉。

翰林院編修鄭一統勅

夫翰林院爲將相之儲。自昔列職其間者。必道德文章極天下之選。在英廟時。有臣陳獻章。講明禮儀之學。名聞當時。法詒後世。朕甚慕焉。爾翰林院編修鄭一統。比以藝文。躋高科。班吉士。博學多聞。聲譽藉藉。而器度行能。蔚有典刑。非俗儒流。夷考其鄉。固獻章里人也。史官重任。爰以付爾。茲復授爾階文林郎。錫之勅命。夫裁定義例。考覈是非。使一代之典。煥然可述。時惟爾責。亦惟爾才。勉竭忠貞。庸副知遇。

翰林院編修趙貞吉勅

朕惟館閣之地。選用吉人。培植儲養。俾參史局。自文皇始。肆朕嗣服。登庸進士。收拔異才。置諸左右。蓋循舊典。爾翰林院編修趙貞吉。往以賓貢。引對在廷。敷陳治道。可謂曰知。朕命爾讀書祕省。淹貫之才。博而有歸。端方之器。久而不撓。朕甚嘉焉。明揚爾賢。擢在此位。用專刊削之任。益究討論之良。茲特授爾階文林郎。錫之勅命。朕聞史才甚難。在乎善惡必書。務撫實而去愛憎。斯爲良史。往祇朕訓。其盡爾心。

翰林院檢討郭希顏勅

朕聞檢討有官。自唐始。第官無常員。惟以別勅留之。我國家設科目。以羅俊髦。其傑然而出者。猶必儲養既久。始預茲選。蓋其慎也。爾翰林院檢討郭希顏。自爾結髮攻儒。已中有司之辟。頃緣廷對。簡在祕垣。好學知方。深於自得。授爾今職。聿觀厥成。爾乃編摩得紀事之體。而文質可比之君子。議論合僉言之公。而是非不謬于聖人。古之良史庶幾哉。茲特授爾階徵仕郎。錫之勅命。往勵爾志。爲朝廷紀載其典刑。期配昔人。使天下懋勉於勸戒。務究所學。朕將觀焉。

翰林院檢討陳東光勅

古者大小史而下。八枋之法。內史掌之。四方之志。外史掌之。公紀述于一朝。示勸懲於百世。今載筆承明。兼總二職者。不在史館諸臣乎。爾翰林院檢討陳東光。蘊蓄甚富。發爲菁華。連中矩于有司。頃賜大對。俾出入中祕。端靖自將。飾學以道。休聲既興。轉而上聞。則夫討論一代之得失。而潤色之以法度之章。以爾

處之。誰曰不可。茲特授爾階徵仕郎。錫之勅命。昔人有言。宰相能制生人。史官兼制生死。此權顧輕哉。爾其毋怠。益圖報稱。

吏部驗封清吏司員外郎趙汝濂誥

自晉文公。執秩以正其官。後世因設司封一人。然皆以無事朝官充。又事悉主于中書。彼特奉行之而已。今制。官備其員。專掌封褒贈卹之政令。非有兼人之資。不以輕授。可謂慎其選矣。爾吏部驗封清吏司員外趙汝濂。進由甲科。簡在祕垣。朕察爾行履端方。可以正官治。器識明達。可以辨人才。俾主文階。遞遷斯序。進修益謹。名實並隆。茲特授爾階奉直大夫。錫之誥命。視賢不失。以事其上。惟爾之能。可不懋哉。以須峻陟。

吏部考功清吏司主事劉思唐勅

朕惟考功之職。掌內外諸司考課之政令。而奉常所定謚議。亦必覆而上之。選部諸司。惟此最要。郎吏之選。朕重其人。爾吏部考功清吏司主事劉思唐。往以甲科之彥。入參儒館。出令度支。問學閎深。而先之器識。幹濟廉敏。而本之公恕。可謂曰賢。明揚爾能。俾踐今職。考覈允當。功用具興。斯朕所嘉賴。以砥礪天下之才者耶。茲特授爾階承德郎。錫之勅命。爾尙夙夜。以永終譽。朕有顯褒。以圖厥成。

吏部考功清吏司主事高耀勅

自三載黜陟幽明之典。防於虞書。而周官計羣吏之課。以議其誅賞。考功之職。所從來上矣。臺郎典領。詢

求惟愼。爾吏部考功清吏司主事高耀。往以儒術有聞。錫對于廷。稱朕意指。朕惟通商惠農。水利爲急。俾往淮東。行已純固。蒞事精恪。一時上下宜之。頃聞爾賢。簡在此位。綜核方嚴。銓筭且允。劇習其澄乎。茲特授爾階承德郎。錫之勅命。夫考功課吏之法。惟明可以辨物。惟公可以範人。勉爲朕衡鑒之。佇觀爾成。以圖休報。

戶部浙江清吏司主事陳大綸父勅

祭法。以死勤事則祀之。今策名委質之臣。之死不貳。雖致身之仁。不錄于卹典。而報主之義。猶施及後人。斯朕之所甚悼也。爾原任廣東德慶州判官陳琚。以胄子之英。策仕郡寮。遂膺圖寄。推誠勝殘。挺身殉職。以忠見忌。未遂顯揚。蔚爾嗣人。亦世載德。所謂積善之報。在其子孫者耶。茲特增爲承德郎。戶部浙江清吏司主事。雖緣寵渥。蓋闡遺忠。

禮部儀制清吏司員外郎岑萬誥

儀部禮樂之司。王政繇出。朕方舉遺興禮。以爲天下先。郎吏參之。宜得賢者。爾禮部儀制清吏司員外郎岑萬。以甲科之秀。起官民部。歷試春曹。其清修之才。詳雅之度。朕聞爾久矣。擢任今官。時惟妙選。撰儀草奏。以博古之識。昌用世之文。將嘉賴焉。茲特授爾階奉直大夫。錫之誥命。於乎。古有柳宗元。非聞人歟。自御史裏行得禮部員外郎。以爲超取顯美。爾今居此。可謂殊遇。奮庸熙載。時乃之休哉。

禮部祠祭清吏司員外郎張馨誥

朕釐正祀典，兢兢焉以協于經言爲難。念茲祠曹，相予參禮，孰能折衷損益，求其至當，俾朕建中和之極，而達於神明之奧也。爾禮部祠祭清吏司員外郎張縉，進由高第，簡在祕垣，朕惟國之大事，在祀與戎，擢爾兵曹，復遷今任。軍旅之事，俎豆之學，無不稱善，非爾明察不私，而守之以毅，直諒多聞，而濟之以勤，能若是耶。茲特授爾階奉直大夫，錫之誥命，昔太史談不得從事於漢封，至以爲恨，汝親司其事，亦顯榮哉。尙務靖共，以須明陟。

禮部精膳清吏司員外郎皇甫濬父誥

世有磊落奇偉之士，不幸而犯人所忌，必爲之中傷而後已。願事久論定，道卒未嘗不直，而慶常有餘，乃知天之報施善人者，昭昭也。爾原任四川重慶府知府皇甫錄，乃禮部精膳清吏司員外郎濬之父，往以吳下之英，奮于甲科，入爲良臣，出爲循吏，增茲多口，遂爾投閑。然約之文，膏之身，以覈爾後人，有美諸子，奮庸熙載，時惟天道哉。比嘗覃恩，復爾官榮，茲以爾子再進爾階中憲大夫，爾尙加意藥餌，厚自輔養，以稱勸忠優老之典，且使天下知厚德者，必有報也，其惟欽承之哉。

禮部儀制清吏司主事尹耕勅

朕惟禮以養人，樂以殖財，蓋人治之大者也。後世治出於二，而後文法之吏，不得輒與於制作之門，子不云乎。君子學道則愛人，言貴本也。爾禮部儀制清吏司主事尹耕，以少年英俊之才，奮于三晉，頃由制科出爲藁城主者，守嚴政舉，上安下和，古謂絃歌之化，斯亦近是乎。歸處儀曹，明禮修樂，茲爲已試，何用不

臧特授爾階承德郎。錫之勅命。爾尙据經考古。推明王道。於玉帛鐘鼓之外。以惠天下。視化行一方。有聞矣。懋哉。欽予時命。

兵部職方清吏司郎中梁廷振誥

周禮職方氏之職。掌地辨國。周知其利害。今制選將練兵。并以授之。蓋兼大司馬進賢與功制軍詰禁之法。非有通材。不能以濟。爾兵部職方清吏司郎中梁廷振。往由制科。歷試在位。治效超等。課以歲月。進爾今官。處事有執持而不苟。檢身恆清慎而不頗。斯可謂卓爾大雅君子矣。茲特授爾階奉政大夫。錫之誥命。今邊政多廢。郊壘未寧。惟謹於擇將。廣於儲材。方今急務。可不念哉。

兵部車駕清吏司員外郎王楊誥

我國家文武各第。其有出于將門。而以文起家。又治行彬彬可述。斯惟兼才。朕所樂予。爾兵部車駕清吏司員外郎王楊。以良將之子。奮於儒科。兩任州刺史。濟乎無慾。綽乎有爲。藹乎其有令聞。擢屬秋曹。復改今職。明慎之聲。既久而彰。塞淵之狀。所至輒效。茲特授爾階奉直大夫。錫之誥命。今藏馬于民。卽古者寓兵于農之意。畜之多。存武備也。調之寡。優民力也。爾惟知所以畜調之法。斯爲善於其官矣。懋哉。欽予時命。

兵部職方清吏司主事呂調羹勅

山海連接邊郡。然負山帶河。實形勝之地。自先臣徐達移鎮于此。遂爲東北之咽喉。我國家特設職方郎

一人專司其事。非得智能才識之士。不以輕授。爾兵部職方清吏司主事呂調羹。學術有用。往以進士兩宰鉅邑。政蹟藹聞。才名大著。故今進之於中臺。介藩重任。因以付之。肆爾慎防守。謹筭籥。丕宣德意。兼著威聲。稱朕意焉。茲特授爾階承德郎。錫之勅命。服此優恩。愈思謹愆。

刑部雲南清吏司主事鄒絢勅

朕惟刑獄難精。自漢氏以來。重之矣。國家建官。準周六典。而刑曹郎獨詳。若審覆敍雪。長貳通治之使。人盡所見。民以無冤。厥惟慎哉。爾刑部雲南清吏司主事鄒絢。世爾家學。有聞于時。頃者舉進士。擢今官。廉潔有爲。明允不苟。一時上下宜之。乃知明刑弼教。類非文法吏所能辦也。茲特授爾階承德郎。錫之勅命。人亦有言。俗儒多儒。健吏鮮仁。仁而不儒。植善仆奸。歸于無訟。則予一人以憚。可不勉歟。

工部營繕清吏司員外郎范欽誥

昔我太祖皇帝。凡有興作。必量度再三。不得已而后爲之。爲之未嘗過度。朕體斯言。曷敢有越志。與我共此者。其司空大夫乎。爾工部營繕清吏司員外郎范欽。察行于鄉里。考言于朝廷。而治之以事。廉謹仁明。州人德之。起曹寵列。俾介厥司。綜事訓工。建明理本。凡所踐更。皆有可述。茲特授爾階奉直大夫。錫之誥命。往膺秩物。無怠厥修。下以盡爾繕修之職。上以成朕恭儉之美。顧不偉哉。

工部都水清吏司主事張珍勅

徐淮。自昔要害之地。今將漕之咽喉也。而徐汴泗交流。呂梁橫絕。故視淮爲險。而治之特難。我國家軫念

邦計專設水部郎以臨之任綦重也爾工部都水清吏司主事張珍以文學之英起身甲科朕察爾雋偉有志可以集事通達有謀可以應變峻拜今職蓋究爾能疏導隨時隄防有豫使士著者無奔潰之虞水運者得順適之便抑亦閉縱惟敘農商具宜將嘉賴焉茲特授爾階承德郎錫之勅命尙其勉旃佇聞成效

貴州道監察御史陳脩勅

御史持朕邦法以董濟內外糾正官邪非強毅忠篤久更器使者不稱其任爾貴州道監察御史陳脩少稟異材進由高第往令郡邑老成循良頃用部使者言俾在此選持廉秉公竭忠彈力政令所加聳聞風采茲特授爾階文林郎錫之勅命維明于體要可以備獻納維公于是非可以議激揚方觀爾成尙懋爾守

廣東道監察御史彭時濟勅

自天子巡狩之禮廢於是以御史監理諸郡後雖職兼抨彈必白大夫而後行之今御史糾察中外又法得直達無所控制可不謂重其任乎爾廣東道監察御史彭時濟往以茂才應鄉舉里選之制出司教鐸再分邑符教之而倫理明養之而生養遂人曰賢哉頃用薦言進爾今職廉勤剛恕休有能聲風霜之任爾克舉之茲特授爾階文林郎錫之勅命爾尙昭德塞違舉能察弊使朕立于無過之地而天下安于平明之化豈不偉哉